

OKU patut terima peruntukan tambahan

Sudah pasti pelbagai cadangan diberikan untuk Bajet 2016 yang bakal dibentangkan Perdana Menteri, Datuk Seri Najib Razak, yang meminta orang ramai mengemukakan cadangan untuk diberi pertimbangan. Dalam menghadapi suasana ekonomi semasa serta mengambil kira ketidakpastian ekonomi peringkat antarabangsa, sudah pasti segala perancangan pembentangan Bajet 2016 kali ini berfokuskan untuk mengurangkan beban kewangan rakyat.

Jika diteliti, pada perancangan bajet tahun sebelumnya, tum-

puan diberikan bagi mengurangkan beban kewangan kumpulan tertentu yang dilihat lebih memerlukan bagi kelangsungan hidup, seperti ibu tunggal, warga emas dan kanak-kanak.

Ekonomi semasa beri tekanan kepada OKU

Dalam proses merangka bajet negara, penting juga sekiranya kerajaan memberi pertimbangan sewajarnya menambah peruntukan terhadap orang kurang upaya (OKU). Dengan masalah dihadapi golongan terbahit, penambahan peruntukan dilihat perlu mengambil kira suasana ekonomi semasa yang sudah pasti memberi tekanan kepada mereka.

Selama ini, kerajaan banyak memberi bantuan kepada golongan terbahit, antaranya Elaun Pekerja Cacat (EPC) sebanyak RM300 sebulan seorang, Bantuan Penjagaan OKU Terlantar/Pesakit Kronik Telantar sebanyak RM300 sebulan seorang dan Bantuan OKU Tidak Berupaya Bekerja (BTB) sebanyak RM150 sebulan seorang.

Jika dilihat, jumlah diterima sudah pasti tidak dapat menampung kos sara hidup pada masa ini. Oleh yang demikian, penting sekiranya kerajaan dapat memberi pertimbangan untuk meningkatkan kadar skim bantuan kewangan untuk golongan terbahit



Peningkatan kadar bantuan mampu membantu OKU yang tidak berkemampuan.

(GAMBAR HIASAN)

supaya mereka dapat menikmati kehidupan lebih selesa.

Selain itu, kerajaan juga diminta memperkenalkan skim bantuan kewangan baharu atau meningkatkan kadar skim bantuan kewangan sedia ada untuk pelajar OKU yang sedang belajar di sekolah serta di institusi pengajian tinggi.

Kurangkan kos kewangan

Peningkatan kadar bantuan kewangan untuk membantu OKU yang tidak berkemampuan membeli peralatan khas seperti kaki palsu, tangan palsu, calipers, tongkat tangan/ketiak, kerusi roda, alat pendengaran, cermin mata khas, kasut khas atau lain-lain peralatan disyorkan

doktor atau pakar perubatan adalah perlu bagi mengurangkan kos kewangan terpaksa dipikul golongan terbahit.

Tidak dapat dinafikan, ada OKU yang masih boleh bekerja serta menyumbang tenaga meningkatkan taraf hidup mereka serta keluarga, pada masa sama membantu ke arah pembangunan ekonomi negara.

Bantuan sama harus diberikan kepada golongan terbahit bagi membantu mereka terus bekerja serta dapat membantu mereka menjana pendapatan sendiri untuk tempoh jangka masa panjang.

Dr Muzaffar Syah Mallow,
Universiti Sains Islam Malaysia

FORUM

Pembaca yang ingin
menyuarakan
pandangan berhubung
isu semasa boleh
menghantar sumbangan
menerusi e-mel:

**bhforum@
bharian.com.my**